

Amar Kavgić iz Tuzle, Šampion zaštite prirode u kategoriji pojedinaca do 30 godina starosti

Amar Kavgić je student treće godine Pravnog fakulteta Univerziteta u Tuzli. U toku svog formalnog obrazovanja uspješno je organizovao, koordinisao i radio na niz projekata koji su doprinijeli razvoju njegove zajednice posebno iz oblasti ekologije i zaštite životne sredine.

Funkciju projektnog menadžera za omladinske inicijative Udruženja građana „Multi“ Tuzla uspješno obavlja od 2013. Stečena neophodna znanja, organizacijske i komunikacijske vještine primjenjivao je u koordinisanju aktivnostima koje su dovele do unapređenja lokalne zajednice i očuvanja pozitivnih društvenih vrijednosti.

Od 2012. godine, obavlja funkciju izvršnog koordinatora projekta „Let's Do It Tuzla“. Svakodnevno ostvaruje internu komunikaciju sa svim članovima tima te rukovodi organizacijom svih projektnih aktivnosti. Organizovao je šest terenskih akcija čišćenja ilegalnih deponija i pet terenskih akcija sadnje drveća. U okviru navedenih akcija na području Grada Tuzla očišćeno je 189 tona otpada i zasađeno 6.000 sadnica raznih vrsta drveća. U terenskim akcijama učešće je uzelo 5.680 volontera.

Idejni je tvorac jedinstvenog programa ekoloških edukacija „Mala škola ekologije“. Cilj programa je edukacija predškolske, osnovnoškolske i srednjoškolske populacije o značaju očuvanja životne sredine i okoliša. Program edukacija „Mala škola ekologije“ je sa implementacijom počeo 2013. godine, održavši preko 150 jedinstvenih prezentacija koje su obuhvatile preko 12.000 učenika. Certificirani je peer-to-peer edukator programa ekoloških edukacija „Mala škola ekologije“.

U toku organizacije i implementacije projektnih aktivnosti, značajno je doprinio razvoju svijesti građana o značaju očuvanja životne sredine, zaštite okoliša, nepravilnom odlaganju otpada kroz preko 500 medijskih pojavljivanja. Učestvovao je na konferencijama „Let's Do It – najveći volonterski pokret u BiH“ i „Let's Do It – Landslide Risk Reduction“ kroz koje je usvajao nova znanja i vještine neophodne za očuvanje okoliša.

Dobitnik je posebnog priznanja za izniman doprinos radu Organizacionog odbora i afirmaciji projekta „Let's Do It Tuzla“ kao i jačanju ekološke svijesti Grada Tuzla za 2016. i 2017. Pored svih navedenih aktivnosti i angažmana, Kavgić je od 2015. godine, član savjeta Gradonačelnika Gradske uprave Tuzla. Aktivno djeluje i u drugim nevladinim organizacijama kao što su Asocijacija studenata Pravnog fakulteta, Udruženje za sport i rekreaciju mladih – Sportske igre mladih BiH, Crveni krst/križ Grada Tuzla i mnoge druge.

U toku organizacije terenskih aktivnosti aktivno ostvaruje saradnju sa privrednicima i kompanijama koje svojim djelovanjem nastoje pozitivno uticati na životnu sredinu.

U kompaniji „Eko život“, ovlaštenom operateru sistema za upravljanje ambalažnim otpadom, angažovan je kao vanjski saradnik za implementaciju projektnih aktivnosti, od kojih se posebno izdvaja projekat „Zeleni otoci u Tuzlanskom kantonu“.

